

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 097741 23 K
Visoko, 31.01.2024. godine

U IME FEDERACIJE BIH

Općinski sud u Visokom, sudija Ana Sotirov uz sudjelovanje zapisničara Kljajić Abebe, u krivičnom predmetu protiv optuženog H.M., zbog krivičnog djela Nasilje u porodici iz člana 222. stav 2. u vezi sa stavom 1. KZ FBiH, rješavajući po optužnici Kantonalnog tužilaštva Zeničko-dobojskog kantona broj: T04 0 KT 0051861 23 od 12.05.2023.godine, na glavnom pretresu održanog dana 31.01.2024.godine u prisustvu Kantonalnog tužitelja Dragiše Pandurević i optuženog H.M., dana 31.01.2024.godine donio je i javno objavio:

P R E S U D U

OPTUŽENI: H.M., sin M. i majke V. rođene O., rođen ... u mjestu S., općina H.P., nastanjen u mjestu G. bb, grad V., pismen, sa završenom osnovnom školom, po zanimanju NK radnik, oženjen, otac jednog mlđb. djeteta, vojsku služio, vodi se u vojnoj evidenciji kod OMO V., lošeg imovnog stanja, državljanin BiH, JMB: ..., osuđivan presudom Osnovnog suda u Vlasenici broj 92 0 K 0048012 17 Kps od 27.10.2017. godine za krivično djelo nedozvoljena proizvodnja i promet oružja ili eksplozivnih materija, KZ RS na kazna zatvora u trajanju od 1 mjesec, uslovno jedna godina,

K r i v j e

Što je:

Dana 03.12.2022. godine, oko 21,00 sati, u Visokom, u kući kojoj živi u zajedničkom domaćinstvu sa suprugom H.H. i njihovim mlđb. sinom a koja se nalazi u mjestu G., u alkoholiziranom stanju vršio psihičko i fizičko nasilje prema supruzi, na način da je nakon prepirke vezano za njihovog mlđb. sina, počeo galamiti na nju, psovati joj i prijetiti da će je ubiti, pa iako je znao i bio svjestan da takvim postupanjem može ugroziti mir, psihičko i fizičko zdravlje člana svoje porodice, to je i htio, a potom je počeo daviti, tako što je uhvatio i stiskao rukama za vrat, te joj iz ruku istrgao njen mobilni telefon koji je razbio, bacivši ga na pod, nakon čega je H. u strahu za svoj život istrčala bosa iz kuće i sakrila se kod komšinice L.N. odakle je pozvala policiju, na koji način je ugrozio mir, tjelesnu cjelovitost i psihičko stanje svoje supruge,

čime je učinio krivično djelo „Nasilje u porodici“ iz člana 222. stav 2. u vezi sa stavom 1. KZ F BiH.

Sud optuženom na osnovu člana 41, 42., i 62. Krivičnog zakona Federacije Bosne i Hercegovine, i z r i č e:

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 3 /tri/ mjeseca, a koja se neće izvršiti ako optuženi za vrijeme od 2 /dvije/ godine ne počini novo krivično djelo.

Na osnovu člana 212. stav 3. ZKP FBiH, oštećena H.H. upućuje se da imovinsko pravni zahtjev u cjelini može da ostvaruje u parničnom postupku.

Na osnovu člana 202. stav 1. u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala iznos od 30,00 KM, a sve u roku od 30 dana, po pravosnažnosti presude pod prijetnjom izvršenja.

O b r a z l o ž e n j e

Kantonalno tužilaštvo Zeničko – dobojskog kantona, optužnicom broj: T04 0 KT 0051861 23 od 12.05.2023.godine, a koja je zaprimljena kod ovog suda dana 18.05.2023.godine, optužilo je H.M. da je počinio krivično djelo nasilje u porodici iz člana 222. stav 2. u vezi sa stavom 1. KZ FBiH.

Optužnica je potvrđena od strane sudije za prethodno saslušanje ovog suda dana 26.05.2023. godine i na ročištu za izjašnjenje o krivnji održanog dana 18.09.2023. godine, optuženi H.M. se izjasnio da nije je kriv za krivično djelo koje mu se stavlja na teret.

U toku dokaznog postupka, po prijedlogu Kantonalnog tužilaštva Zeničko – dobojskog Kantona, sud je saslušao svjedoke L.N., H.E., S.E., B.I., N.E. – socijalni radnik JU „Centar za socijalni rad“ V. i oštećenu H.H..

Sud je izvršio uvid u materijalne dokaze optužbe i to: Rješenje Općinskog suda u Visokom broj: 41 0 Pr 095446 22 Pr od 05.12.2022. godine, Službenu zabilješku JU „Centra za socijalni rad“ V. broj: 02-04-11-2964/22 od 05.12.2022. godine, Specijalistički nalaz JU Dom zdravlja V., Služba hitne medicinske pomoći od 04.12.2022. godine, na ime H.H., Specijalistički nalaz JU Dom zdravlja V., Služba hitne medicinske pomoći od 03.12.2022. godine, na ime H.M., Alko-test print od 03.12.2022. godine na ime H.M. i Izvod iz kaznene evidencije za optuženog H.M., PS H.P. od 14.12.2022. godine.

U svojoj odbrani optuženi je negirao da je počinio krivično djelo Nasilje u porodici prema na način, vrijeme i mjesto poblizje opisano u izreci presude.

Oštećena H.H. je izjavila da je dana 03.12.2022.godine sa sinom bila kod kuće a optuženi je bio na poslu. M. je došao sa posla oko 9 sati uveče , bio je pijan, jednu pivu pio a drugu je držao u ruci. Dijetu je vidio na licu dvije jedrice (to su zapravo bubuljice) i pitao je dijete ko te to udario. Udario je dijete i onda je uhvatio nakon toga i mene za vrat i psovao svu familiju, i razbio mi telefon i govorio: „ Ti ćeš u grob a ja ću u zatvor, ja ću izaći a ti nećeš “. Jako me stezao za vrat, osjetila sam strah, bol i

stres, u momentu kada je ponovo uhvatio dijete ja sam se uspjela oteti i otišla u komšiluk bosa. Od komšinice N.L. sam pozvala policiju.

Na osnovu izjave svjedoka L.N., koja je prva komšinica optuženog i oštećene H.H., sud je utvrdio da je oštećena dana 03.12.2022.godine uletila u kuću svjedoka, bila je bosa, pala je na pod i rekla: “ Zovite policiju – ubiće mi dijete “. H.H. je bila preplašena.

Na osnovu izjava svjedoka H.E., S.E. i B.I., policijski službenici PS V., koji su dana 03.12.2022.godine postupili po prijavi za krivično djelo nasilje u porodici i koji su bili upućeni na teren u mjestu G., grad V., u kući u kojoj živi optuženi i oštećena sa mld. dijeteom, sud je utvrdio da su isti zatekli oštećenu H.H. koja se sklonila kod komšinice i koja je od strane svog supruga napadnuta fizički. U razgovoru sa optuženim došli su do saznanja da je optuženi navedenog dana bio u alkoholisanom stanju, koji je napao suprugu jer mu nije spremila ništa za večeru. Optuženog su odvezli u Dom zdravlja gdje su mu izmjerili prisustvo alkohola i utvrdili da je imao 1,97 promila alkohola u krvi, a što je sud utvrdio u potvrdu u AlcoQuant od 03.12.2022.godine.

Na osnovu izjave svjedoka E.N., zaposlena u Centru za socijalni rad V., a izjava je potvrđena Službenom zabilješkom JU Centra za socijalni rad V. broj: 02-04-11-2964/22 od 05.12.2022.godine, sud je utvrdio da je dana 04.12.2022.godine kao dežurni radnik JU Centra za socijalni rad V. zajedno sa predstavnicima PS V., H.B. i J.A., otišla na adresu..., grad V., gdje je zatekla H.H. i mldb. sina i da je u obavljenom razgovoru sa H. navela da od samog sklapanja bračne zajednice (2007 .godine) sa H.M.om izložena je nasilju u porodici. Da je dana 03.12.2022.godine došlo do svađe između H. i M. iz razloga što je M. pitao H. šta je na bradi kod mldb.1. Tokom svađe je M. navodno krenuo prema H. da je davi a u tom momentu je prišao mldb.1. ocu i odmaknuo ga od majke. U daljem razgovoru H. je navela da ne želi više da živi sa M., i da će ići kod svojih roditelja u M..

Svjedok E.N. je obavila razgovor sa mldb.1. koji je izjavio da je otac sinoć došao kući u alkoholiziranom stanju, da je počeo svađu sa majkom nakon čega je prišao majci da je udavi ali ga je on odmakao od majke. mld.1. bi više volio da živi sa ocem koji ga nikad nije udario niti mu je pravio problem. Da sa ocem ima dobar odnos i da mu pomaže u školskim obavezama.

Uvidom u Specijalistički nalaz JU “Dom zdravlja” V. od 04.12.2022.godine sud je utvrdio da je dana 04.12.2022.godine oštećena H.H. dovedena u pratnji policije u Dom zdravlje V. gdje je od strane ljekara konstantovano da je ista uznemirena i plačljiva.

Uvidom u Rješenje Općinskog suda u Visokom broj: 41 0 Pr 095446 22 Pr od 05.12.2022.godine, sud je utvrdio da je Sud izrekao zaštitne mjere optuženom zabrana približavanja žrtvi nasilja i zabrana uznemiravanja i uhođenja žrtve nasilja u trajanju od 1 (jedne) godine.

Na osnovu ovako utvrđenog činjeničnog stanja, sud je sa sigurnošću utvrdio da je optuženi H.M. počinio krivično djelo Nasilje u porodici iz člana 222. stav 2. u vezi stava 1. KZ FBiH, na način vrijeme i mjesto pobježe opisano u izreci presude.

Odlučujući o uračunljivosti optuženog, sud nije našao postojanje okolnosti koje bi dovele u pitanje uračunljivost optuženog u vrijeme izvršenja krivičnog djela.

Odlučujući o vinosti optuženog u vrijeme izvršenja krivičnog djela, sud smatra da je optuženi navedeno krivično djelo počinio sa direktnim umišljajem, jer je bio svjestan da preduzimanjem radnji izvršenja opisanih u izreci presude će nastupiti zakonom zabranjene posljedice čije nastupanje se i dogodilo, ali je htio izvršenje radnje i nastupanje naprijed opisanih zakonom zabranjenih posljedica.

Prilikom odlučivanja o vrsti i visini krivično pravne sankcije, sud je kao olakšavajuću okolnost na strani optuženog cijenio materijalne i porodične prilike, dok otežavajuće prilike na strani optuženog sud nije našao.

Na osnovu navedenog, sud je odlučio optuženom H.M.u izreći uslovnu osudu kojom se optuženom za počinjeno krivično djelo utvrđuje kazna zatvora u trajanju od 3 /tri/ mjeseca, a koja se neće izvršiti ako optuženi za vrijeme od 2 /dvije/ godine ne počinu novo krivično djelo i da će se sa izrečenom uslovnom osudom ostvariti svrha kažnjavanja i postići ciljevi opšte i specijalne prevencije i da će preventivno djelovati na optuženog da ubuduće ne čini nova krivična djela.

Na osnovu člana 212. stav 3. ZKP FBiH, oštećena H.H. upućuje se da imovinsko pravni zahtjev u cjelini može da ostvaruje u parničnom postupku.

Na osnovu člana 202. stav 1. u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala iznos od 30,00 KM, a sve u roku od 30 dana, po pravosnažnosti presude pod prijetnjom izvršenja.

Sudija
Ana Sotirov

PRAVNA POUKA: Protiv ove presude stranke imaju pravo žalbe Kantonalnom sudu Zenica u roku od 15 dana putem ovog suda po prijemu iste. Žalba se podnosi ovom sudu u 3 primjerka.